

U Zagrebu održana je promocija knjige „Hercegovina u kartama i planovima“

16.03.2015 13:01



U Leksikografskom zavodu „Miroslav Krleža“ u Zagrebu održana je promocija knjige „Hercegovina u kartama i planovima“, autora dipl. ing. geod. Mirka Alilovića. Organizator promocije bilo je Hrvatsko kartografsko društvo, koje je istog dana održalo i redovnu godišnju skupštinu. Predstavljajući knjige bili su glavni urednik knjige prof. dr. sc. Božo Skoko, urednik dipl. ing. geod. Željko Obradović i recenzent prof. dr. sc. Miljenko Lapaine. U uvodnom dijelu Božo Skoko je istakao da ova knjiga po svom sadržaju nije samo kartografski prikaz Hercegovine nego je uistinu i historijska priča Humske, odnosno Hercegovine zemlje, koja nam na poseban način prikazuje historijske mijene, uticaje i trendove, mijenjajući sudbinu Hercegovine, ali i njenu teritoriju. Centralno pitanje ove knjige, koje se povlači od početka do kraja, jeste što je Hercegovina bila kroz historiju, dokle se prostirala i koju teritoriju danas možemo smatrati Hercegovinom.

Miljenko Lapaine je istakao značaj ove knjige u ukupnoj kartografskoj literaturi, ističući bogatstvo knjige značajnim i kvalitetnim kartografskim priložima.

Željko Obradović je naglasio svu dosadašnju angažiranost Mirka Alilovića na stručnoj brizi o svom kraju još od davnih 90-tih, a kao rezultat je stiglo ovo kvalitetno izdanje namijenjeno najširem krugu čitalaca.

Na kraju prezentacije prisutnima se obratio i sam autor, koji se zahvalio svima onima koji su mu pomogli u izdavanju knjige. Inače, Mirko Alilović je rođen u Ljubuškom i dugogodišnji je priznati stručnjak iz geodetskog i katastarskog sektora, a u penziju je otišao kao zamjenik direktora Državne geodetske uprave Republike Hrvatske. Očekuje se i prezentacija knjige u njegovoj rodnoj Hercegovini.